



**Minneapolis Lub Tuam Tsev Hauj Lwm
Ntsig Txog Tub Ceev Xwm
Phau Ntawv Qhia Siv Txoj Cai thiab Txheej
Txheem**

Nab Npawb:
7-800

Xuv Xya – Cov Kev Ua Hauj Lwm Sab Nrauv

Kev Pab Fab Kev Tawm Tswv Yim

7-809 Kev Pab Thaum Muaj Xwm Txheej Kub Ntxhov
(06/22/01) (12/28/06) (11/06/07) (10/25/18) (03/01/19) (04/01/19) (08/15/22)

I. Lub Hom Phiaj

Kev dawb huv ntawm lub neej, tub ceev xwm li kev nyab xeeb thiab kev pov thaiv zej tsoom yuav yog cov qauv cai ntawm Minneapolis Lub Tuam Tsev Hauj Lwm Ntsig Txog Tub Ceev Xwm (Minneapolis Police Department, MPD) cov cai thiab cov txheej txheem pab txhawb thaum muaj xwm txheej kub ntxhov.

Lub hom phiaj ntawm txoj cai no yog los ua kom MPD txhua tus neeg ua hauj lwm uas tau cog lus muaj cov cai thiab cov txheej txheem uas meej tseeb thiab zoo ib yam hais txog kev sib tham nrog cov neeg uas tab tom ntsib xwm txheej kub ntxhov los ntawm:

- Kev txhim kho kev nyab xeeb ntawm tib neeg nyob rau hauv qhov xwm txheej kub ntxhov, cov tub ceev xwm, thiab zej zog ntawm Minneapolis,
- Kev pab txhawb kev daws teeb meem hauv zej zog los pab tib neeg nyob rau hauv qhov xwm txheej kub ntxhov, thiab
- Kev tshem cov neeg ntawd tawm ntawm txheej teg kev ua hauj lwm saib xyuas kev ncaj ncees fab kev caij lij choj.

II. Cov Ntsiab Lus Txhais

Pab pawg neeg ua hauj lwm Pab Thaum Muaj Xwm Txheej Kub Ntxhov Fab Kev Coj Cwj Pwm (Behavioral Crisis Response, BCR): Lub Nroog Minneapolis tau teeb tsa pab pawg neeg ua hauj lwm Pab Thaum Muaj Xwm Txheej Kub Ntxhov Fab Kev Coj Cwj Pwm (Behavioral Crisis Response, BCR) los pab cov xwm txheej uas tshwm sim ntawm xwm txheej kub ntxhov kev noj qab haus huv fab siab ntsws uas tsis loj. Txhau tus neeg pab xwm txheej kub ntxhov yog cov neeg ua hauj lwm los sis cov kws tshwj xeeb txog kev noj qab haus huv fab siab ntsws raws li tau hais tseg los ntawm Tsab Cai MN tshooj 245.426, Subd. 17 thiab 18.

Xwm Txheej Kub Ntxhov: Qhov teeb meem los sis qhov xwm txheej uas muaj kev tso hem thawj rau tus neeg li kev nyab xeeb thiab kev noj qab haus huv los ntawm cov kev cov nyom kev noj qab haus huv fab kev coj cwj pwm, uas suav nrog kev muaj mob fab siab ntsws, kev xiam oob qhab fab kev loj hlob, kev siv yeeb tshuaj, los sis kev muaj kev ntxhov siab ntau. Qhov xwm txheej kub ntxhov tuaj yeem cuam tshuam rau tus neeg li kev nkag siab los sis kev paub txog qhov teeb meem los sis qhov xwm txheej yog qhov kev nyuaj uas tsis tuaj yeem tiv taus uas tshaj li tus neeg cov chaw muaj ntaub ntawv thiab cov kev tiv thaiv tam sim no thiab tej zaum yuav

suav nrog kev nyuaj siab uas tsis zoo li ib txwm nyob rau hauv lawv lub neej uas tsim ua rau tus neeg ntawd tsis tuaj yeem ua tau hauj lwm raws li ib txwm. Tej zaum qhov xwm txheej yuav, tab sis tsis muaj kev tsim nyog, tsim ua rau muaj kev xav los sis kev nqis tes ntau ntxiv los sis loj uas txog rau qib siab kawg nkaus uas muaj feem muaj kev phom sij rau tus neeg los sis lwm tus neeg.

Kev Pab Thaum Muaj Xwm Txheej Kub Ntxhov: Qhov kev rau siab ntawm MPD tus tub ceev xwm txhawm rau txo tus neeg ntawd qhov xwm txheej kub ntxhov los sis xa txuas mus ntxiv los sis xa tus neeg ntawd mus rau lwm cov kev pab cuam raws li phim.

Tus Neeg Lis Hauj Lwm Txog Kev Pab Thaum Muaj Xwm Txheej Kub Ntxhov: Tus tub ceev xwm ntawm MPD uas lav ris rau Lub Khoos Kas Kev Pab Thaum Muaj Xwm Txheej Kub Ntxhov. Tus Neeg Lis Hauj Lwm Txog Kev Pab Thaum Muaj Xwm Txheej Kub Ntxhov yog qhov chaw txuas lus ncu ntawm qhov teeb meem kev noj qab haus huv fab siab ntsws thiab teeb meem kev pab thaum muaj xwm txheej kub ntxhov uas cuam tshuam rau MPD thiab lub zej zog, uas suav nrog kev cob qhia kev pab thaum muaj xwm txheej kub ntxhov, kev tshaj tawm thiab cov cai. Tus Neeg Lis Hauj Lwm Txog Kev Pab Thaum Muaj Xwm Txheej Kub Ntxhov yuav ceev cia cov kev sib raug zoo ntawm kev ua hauj lwm txuas mus ntxiv nrog rau txhua tus khub hauv zej zog, uas tsom kwm rau kev noj qab haus huv fab siab ntsws thiab cov kev koom tes pab txhawb.

Daim Foos Txheeb Sau Ntaub Ntawv Txog Kev Pab Thaum Muaj Xwm Txheej Kub Ntxhov: Daim foos txheeb sau ntaub ntawv uas sau ua ke cov ntaub ntawv txog kev pab thaum muaj xwm txheej kub ntxhov uas yuav tsum tau muaj rau MPD siv los taug qab thiab ntsuam xyuas cov kis khoob nyob rau hauv cov kev pab txhawb thiab kev cob qhia txog kev pab thaum muaj xwm txheej kub ntxhov.

Khoos Kas Kev Pab Thaum Muaj Xwm Txheej Kub Ntxhov: Lub khoos kas kev koom tes ncu ntawm tub ceev xwm, cov chaw sawv cev saib xyuas kev noj qab haus huv fab siab ntsws, cov neeg pab txhawb, thiab lub zej zog uas nrhiav kev ua kom ua tau raws li cov hom phiaj kev nyab xeeb, kev nkag siab, thiab muab kev pab cuam rau tib neeg thaum muaj xwm txheej kub ntxhov, cov uas ntsib teeb meem kev noj qab haus huv fab siab ntsws thiab lawv cov tsev neeg. Cov hom phiaj ntawm lub Khoos Kas Kev Pab Thaum Muaj Xwm Txheej Kub Ntxhov yog txhawm rau:

- Txhim kho qhov kev nyab xeeb thiab kev ruaj ntseg ntawm tib neeg thaum muaj xwm txheej kub ntxhov thiab lawv tsev neeg, cov neeg hauv lub zej zog, thiab cov tub ceev xwm.
- Txhim kho qhov zoo ntawm lub neej rau cov neeg uas ntsib kev muaj mob fab siab ntsws los sis qhov xwm txheej kub ntxhov.
- Hloov pauv txoj hauv kev uas zej tsoom thiab cov txheej teg kev ua hauj lwm saib cov neeg uas ntsib kev muaj mob fab siab ntsws los sis qhov xwm txheej kub ntxhov.
- Hloov pauv txoj hauv kev uas cov txheej teg kev ua hauj lwm saib xyuas kev noj qab haus huv thiab kev ncaj ncees fab kev cai lij choj muab kev pab rau cov neeg uas ntsib kev muaj mob fab siab ntsws los sis qhov xwm txheej kub ntxhov.

Tus Tub Ceev Xwm Uas Tau Txais Kev Cob Qhia Txog Kev Pab Thaum Muaj Xwm

Txheej Kub Ntxhov: Tus tub ceev xwm saib xyuas kev thaj yeeb uas muaj ntawv tso cai ntawm MPD uas tau ua tiav MPD qhov kev cob qhia kev pab thaum muaj xwm txheej kub ntxhov uas tau txais kev pom zoo. Cov Tub Ceev Xwm Uas Tau Txais Kev Cob Qhia Txog Kev Pab Thaum Muaj Xwm Txheej Kub Ntxhov ua hauj lwm txuas lus nrog rau cov khub hauv zej zog, cov chaw saib xyuas kev noj qab haus huv fab siab ntsws thiab cov koom haum.

Kev Xiam Oob Qhab Fab Kev Loj Hlob: Feem ntau lawm kev xiam oob qhab fab lub cev ntaj ntsug, kev txawj ntse, los sis fab txoj kev xav yog tau tshwm sim los ntawm kev loj hlob fab leeg xa xov uas tsis zoo li ib txwm xws li muaj mob puas hlwb los sis muaj mob hlwb tsis zoo uas tsim ua rau tus neeg ntawd li kev ua hauj lwm muaj ciam txwv nyob rau hauv cov fab xws li kev saib xyuas tus kheej, lus, kev kawm, kev txav mus los, kev qhia tus kheej, kev nkag siab, los sis lub peev xwm ua neej yam uas muaj kev ywj pheej thiab yus khwv nyiaj txaus yus siv.

Kev tso tawm: Kev tso tawm yog qhov kev txiav txim uas siv tswv yim txhawm rau tawm mus, ncuva kev txuas lus, los sis ncuva kev saib xyuas tus neeg thaum muaj xwm txheej kub ntxhov thaum uas tsis tas yuav muaj kev ceev cia lawv tam sim ntawd.

Kev Muaj Mob Fab Siab Ntsws: Tsab Cai MN Tshooj 245.462, Subd. 020 lub ntsiab lus ntawm kev muaj mob fab siab ntsws yog "kev tsis zoo li ib txwm ntawm cov feem xyuam ntawm lub hlwb los sis kev tsis zoo li ib txwm ntawm kev xav, txoj kev xav, kev lees paub, kev yoog tus kheej, cim xeeb, los sis kev coj cwj pwm uas tseem ceeb rau fab chaw kuaj mob uas tau qhia meej tseeb nyob rau hauv daim npe cov khauj kev ntaus nqi mob uas tau tso tawm los ntawm tus thawj coj, thiab muaj cov ciam txwv rau tus neeg ntawd lub peev xwm kev ua hauj lwm ntawm kev ua neej nyob txhua hnuv xws li cov kev sib raug zoo ntiag tug, cov kev npaj kev ua neej, kev ua hauj lwm thiab kev so ua si." Cov tsos mob fab siab ntsws tej zaum yuav qhia tshwm los ntawm kev muaj qhov tsis zoo rau tus neeg ntawd li kev ua hauj lwm fab kev txhawj ntse, txoj kev xav, los sis kev ua hauj lwm fab kev coj cwj pwm uas zoo li ib txwm, thiab tau tshwm sim los ntawm cov feem xyuam fab zej tsoom, fab siab ntsws, tshuaj khes mis los ntawm yam muaj sia, caj ces, los sis lwm feem xyuam.

Tus Neeg Uas Nyob Rau Hauv Qhov Xwm Txheej Kub Ntxhov (PIC): Tus khauj suav rau tus neeg uas tab tom ntsib qhov xwm txheej los sis teeb meem ntawm xwm txheej kub ntxhov (raws li tau hais nyob rau hauv txoj cai no).

III. Txoj Cai

- A.** MPD yuav saib xyuas cov kev sib ntsib nrog rau cov tib neeg nyob rau hauv qhov xwm txheej kub ntxhov nyob rau tus yam ntxwv uas qhia pom txog txiaj ntsig ntawm kev pov thaiv, kev nyab xeeb thiab kev dawb huv ntawm lub neej, thaum uas peb txhawb lub meej mom ntawm txhua tus neeg. Tej zaum yuav tsum tau ua kom cov tib neeg uas nyob rau hauv qhov xwm txheej kub ntxhov qaug zog ntxiv thiab ua zoo saib tshwj xeeb ntxiv.
- B.** Thaum twg los xij uas ua tau thiab phim, cov tub ceev xwm yuav siv cov tev niv kev txo thiab lwm cov hauv kev xaiv hloov kev siv dag zog nyob rau qib siab, uas raug raws li lawv qhov kev cob qhia (raws li P&P 5-301).

- C. MPD yuav saib xyuas cov xwm txheej uas cuam tshuam rau cov neeg uas muaj mob fab sib ntsws, siv tshuaj khes mis tswj los sis xiam oob qhab fab kev loj hlob thiab cov uas nyob rau hauv qhov xwm txheej, uas siv kev saib xyuas thiab kev paub, uas ua kom ntseeg siab tias cov neeg ua hais los ntawd tau txais kev pab phim raws li lawv cov kev xav tau.

IV. Cov Txheej Txheem/Cov Kev Cai

A. Kev Pab Thaum Muaj Xwm Txheej Kub Ntxhov

1. Kev pab raws li cov kev hu uas cuam tsuam rau tus neeg nyob rau hauv qhov xwm txheej kub ntxhov
 - a. Thaum twg los xij uas ua tau, Tus Tub Ceev Xwm Uas Tau Txais Kev Cob Qhia Txog Kev Pab Thaum Muaj Xwm Txheej Kub Ntxhov yuav raug xa mus daws cov xwm txheej uas cuam tshuam rau tus neeg nyob rau hauv qhov xwm txheej kub ntxov uas ntseeg tias poob rau qhov muaj kev phom sij rau nws tus kheej los sis lwm tus, thiab:
 - Ntseeg tias muaj mob fab siab ntsws los sis kev xiam oob qhab fab kev loj hlob, los sis
 - Ntseeg tias tau siv tshuaj khes mis pab tswj los sis qaug dej qaug cawv nyob rau hauv zej toom.
 - b. Yog tias cov tub ceev xwm uas raug xa mus los sis pab raws li qhov kev hu uas cuam tshuam rau Tus Neeg Nyob Rau Hauv Qhov Xwm Txheej Kub Ntxhov (PIC) tsis tau txais kev cob qhia txog Kev Pab Thaum Muaj Xwm Txheej Kub Ntxhov, ces cov tub ceev xwm yuav tau ceeb toom rau lub chaw uas xav kom xa Tus Tub Ceev Xwm Uas Tau Txais Kev Cob Qhia Txog Kev Pab Thaum Muaj Xwm Txheej Kub Ntxhov tuaj mus pab.
2. Ceeb toom qhia rau tus neeg ntawd paub txog cov khauj ruam uas tau ua

Thaum nqis tes ua kiag, cov tub ceev xwm tsim nyog ceeb toom qhia rau tus neeg thiab lawv tsev neeg (yog tias nyob rau hauv qhov chaw muaj xwm txheej) paub txog cov kauj ruam uas tau ua thaum pab koj tus neeg ntawd mus cuag chaw kho mob, kev ua cov kev xa txuas mus, los sis kev ua qhov kev ntes, uas suav nrog kev muab cov ntaub ntawv xws li cov nab npawb xov tooj txuas lus thiab cov laj thawj rau cov kev nqis tes uas tau ua.

3. Cov tub ntxhais hluas uas nyob rau hauv qhov xwm txheej kub ntxhov
 - a. Tej zaum cov tub ceev xwm uas pab raws li qhov kev hu uas cuam tshuam rau tus neeg nyob rau hauv qhov xwm txheej kub ntxhov uas pom tias muaj tus tub ntxhais hluas xav tau kev saib xyuas fab siab ntsws (tsis hais yuav nyob rau kev raug ntes los sis tsis nyob los xij) yuav txuas lus rau Hennepin Khauj Tim Lub Chaw Pab Cuam Thaum Muaj Xwm Txheej Kub Ntxhov Rau Me Nyuam Yaus Li Kev Noj Qab Haus Huv Fab Siab Ntsws Uas Txav Mus Los 24/7 (Mobile Mental Health Child Crisis Services) (612-348-2233) txhawm rau thov kev pab.

- b. Saib raws li Tsab Cai MN tshooj 260E.06, cov tub ceev xwm yuav tshaj tawm qhov xwm txheej mus rau Lub Chaw Pab Cuam Pov Thaiv Me Nyuam Yaus (Child Protection Services Intake) ntawm 612-348-3552.

B. Cov Txheej Txheem Kev Nkag Mus Kho Thaum Muaj Mob Xwm Txheej Ceev thiab Cov Kev Tuav Cia Kev Thauj Mus Los

1. Cov kev tuav cia kev thauj mus los

Saib raws li Tsab Cai MN tshooj 253B.051, subd. 1, yog tias tus tub ceev xwm saib xyuas kev thaj yeeb los sis tus tub ceev xwm saib xyuas kev noj qab haus huv muaj laj thawj rau qhov kev ntseeg, tsis hais yuav yog los ntawm kev tsom kwm saib ncaj nraim rau tus neeg ntawd li kev coj cwj pwm los sis muaj ntaub ntawv uas tuaj yeem ntseeg tau hais txog tus neeg ntawd li kev coj cwj pwm nyob rau tsis ntev los no thiab, yog tias muaj, kev paub los sis cov ntaub ntawv uas tuaj yeem ntseeg tau uas cuam tshuam rau tus neeg ntawd li kev coj cwj pwm los sis kev saib xyuas nyob rau yav tag los uas tus neeg ntawd ntseeg tias tau poob rau qhov muaj kev phom sij rau tus kheej los sis lwm tus neeg, thiab:

- Ntseeg tias muaj mob fab siab ntsws los sis kev xiam oob qhab fab kev loj hlob, los sis
 - Ntseeg tias tau siv tshuaj khes mis pab tswj los sis qaug dej qaug cawv nyob rau hauv zej tsoom.
- a. Yuav tsum muaj tag nrho ob feem xyuam xyaw txuas mus no tib si txhawm rau ua kev txais nkag tib neeg mus rau hauv qhov kev saib xyuas raws li kev tuav cia kev thauj mus los:
- Muaj mob fab siab ntsws los sis kev xiam oob fab kev loj hlob, los sis tau siv tshuaj khes mis pab tswj los sis qaug dej qaug cawv nyob rau hauv zej tsoom. *thiab*
 - Poob rau qhov muaj kev phom sij rau tus kheej los sis lwm tus neeg yog tias tsis muab ceev cia tam sim ntawd.
- i. Tus tub ceev xwm daim ntawv qhia yuav tsum sau qhia cov ntaub ntawv tseeb tiag tias vim li cas tus tub ceev xwm thiaj li muaj laj thawj ntseeg tias tag nrho ob feem xyuam xyaw siv tau tib si.
- b. Tus tub ceev xwm saib xyuas kev thaj yeeb los sis saib xyuas kev noj qab haus huv tsis tas yuav tsoom kwm saib ncaj nraim qhov kev coj cwj pwm los sis lwm cov ntaub ntawv tseeb tiag thaum uas kev tuav cia kev thauj mus los yog saib raws li thiab tej zaum yuav ua zoo saib rau cov ntaub ntawv los ntawm lwm cov chaw muaj ntaub ntawv uas ntseeg tau thiab tso siab tau yam uas muaj zoo laj thawj.
- i. Cov chaw muaj ntaub ntawv yog saib raws li cov ntawv qhia txog tus neeg ntawd, cov ua pov thawj tim khawv, cov neeg hauv tsev neeg, los sis qhov chaw muaj xwm txheej uas tshwm sim.

- ii. Cov lus qhia uas tsis qhia npe yuav tsum muaj kev qhia meej tias yog los ntawm kev tsom kwm saib ncav nraim los sis cov chaw muaj taub ntawv uas tuaj yeem txheeb xyuas tau, ntseeg siab tau.
- c. Yog tias tus neeg nyob rau hauv qhov xwm txheej kub ntxhov tsuas tsim ua rau muaj kev phom sij rau tus kheej xwb thiab tsis yog rau lwm tus, thiab uv taus rau qhov kev tuav cia kev thauj mus los, ces cov tub ceev xwm tsim nyog ua zoo saib rau qhov tias seb kev chwv tus neeg nyob rau hauv qhov xwm txheej kub ntxhov txuas mus ntxiv puas yuav tsim ua rau muaj kev pheej hmoo yam uas tsis muaj zoo laj thawj rau tus neeg ntawd, zej tsoom los sis cov tub ceev xwm.
 - i. Tej zaum cov tub ceev xwm yuav xaiv kev txo los sis kev tshem tawm yam uas muaj kev tawm tswv yim txhawm rau zam kev siv dag zog fab lub cev ntaj ntsug thaum tsis muaj qhov kev phom sij rau tus neeg nyob rau hauv qhov xwm txheej los ntawm kev ua phem rau tus kheej thiab tus neeg ntawd tsis tau ua txhaum los sis ua phem loj.
 - ii. Cov tub ceev xwm tsuas tsim nyog ua zoo saib rau qhov tev niv no thaum nws muaj kev nyab xeeb thiab ua zoo ceev faj uas yuav ua li ntawd xwb.
- d. Tus tub ceev xwm yuav tau ua kom tiav Daim Ntawv Thov los ntawm Tus Tub Ceev Xwm Saib Xyuas Kev Thaj Yeeb rau Daim Foos Kev Ntsuam Xyuas Xwm Txheej (MP-9094), los kuj tau hu ua MPD daim foos "kev tuav cia kev thauj mus los", thaum txais nkag tus neeg ntawd rau hauv qhov kev saib xyuas raws li Tsab Cai MN tshooj 253B.051 subd. 1 thiab kev thauj tus neeg ntawd mus rau lub chaw saib xyuas txhawm rau ua kev ntsuam xyuas.
 - i. Daim foos tuaj yeem nrhiav tau nyob rau hauv City Talk raws li Cov Foos.
 - ii. Daim foos tuaj yeem sau tau nyob rau hauv oos lais tab sis yuav tsum tau luam tawm txhawm rau muab faib.
 - iii. Tus tub ceev xwm saib xyuas kev ruaj ntseg uas sau daim foos yuav tsum tau muab daim theej tawm ntawm daim foos uas tau sau tiav lawm mus rau:
 - lub chaw saib xyuas kev noj qab haus huv,
 - tus neeg uas tau txais nkag rau qhov kev saib xyuas thiab
 - mus rau lub chaw sawv cev kev thauj mus los, yog tias tus tub ceev xwm tsis tau thauj tus neeg ntawd mus.
- e. Kev tuav cia kev thauj mus los pab ua rau tus neeg ntawd raug thauj mus rau lub tsev kho mob thiab tuav cia kom txog thaum tau txais kev ntsuam xyuas. Tom qab qhov kev ntsuam xyuas, tej zaum lub tsev kho mob yuav tso tawm tus neeg ntawd los sis muab lawv tso rau hauv qhov kev tuav cia 72 teev.
 - i. Thaum tus tub ceev xwm pab ua raws li tus tub ceev xwm saib xyuas kev noj qab haus huv qhov kev hu kom pab thauj tus neeg ntawd, ces tus tub ceev xwm saib

xyuas kev noj qab haus huv tsim nyog txheeb xyuas lawv tus kheej rau cov tub ceev xwm tias muaj kev tsim nyog raws li kev cai lij choj los sau daim ntawv kev tuav cia kev thauj mus los.

- ii. Yog tias qhov lus txib tuav cia kev thauj mus los yog sau ua ntaub ua ntawv los ntawm tus tub ceev xwm saib xyuas kev noj qab haus huv (nyob rau hauv los sis sab nrauv ntawm lub chaw) thiab tau qhia rau tus tub ceev xwm lawm, ces tej zaum tus tub ceev xwm yuav tuaj yeem ua tau qhov kev ceev cia kev thauj mus los.
- iii. Dhau li no lawm cov tub ceev xwm kuj muaj cai kos npe rau hauv daim ntawv tuav cia kev thauj mus los, uas saib raws li cov feem xyuam uas tau teeb tseg saum toj.

2. Tub ceev xwm saib xyuas kev noj qab haus huv txhais tau tias

Saib raws li Tsab Cai MN tshooj 253B.02, Subd. 9, tus tub ceev xwm saib xyuas kev noj qab haus huv txhais tau tias yog ib tug neeg ntawm cov txuas mus no:

- tus kws kuaj mob uas muaj ntawv tso cai;
- tus kws tshwj xeeb saib xyuas kev noj qab haus huv (raws li tau hais tseg nyob rau hauv tsab Cai MN tshooj 245.462, Subd. 18);
- tus neeg ua hauj lwm pab zej tsoom uas muaj ntawv tso cai;
- tus kws tu mob uas tau sau npe uas ua hauj lwm nyob rau hauv chav kho mob xwm txheej ceev ntawm lub tsev kho mob;
- tus kws tu mob uas tau sau npe uas ua kev nqis tes nyob rau qib siab (APRN);
- tus kws tshwj xeeb saib xyuas kev noj qab haus huv muab kev pab thaum muaj xwm txheej kub ntxov uas txav mus los; los sis
- tus tswv cuab uas raug xaiv uas raug raws cai ntawm lub chaw kuaj xyuas ua ntej.

3. Kev Thauj Mus Los rau Kev Nkag Mus Kho Thaum Muaj Xwm Txheej Ceev

- a. Tej qhov kev thauj mus los uas muaj kev tsim nyog rau kev nkag mus kho thaum muaj xwm txheej ceev yuav tsum yog mus rau lub chaw kho mob (xws li HCMC, Fairview Riverside, NMMC los sis Abbott).
- b. Txhua cov kev tshawb nrhiav ntawm tus neeg uas tau txhais nkag rau hauv qhov kev saib xyuas thiab raug thauj mus yuav tsum ua raws li txoj cai Kev Tshawb Nrhiav thiab Kev Tuav Cia (P&P 9-201).
- c. Tau hais kom cov tub ceev xwm thov tsheb thauj neeg mob tuaj thauj tus neeg sib ntaus mus rau lub tsev kho mob.
 - i. Tus tub ceev xwm yuav caij nyob rau hauv lub tsheb thauj neeg mob ncuaj sij hawm thauj tus neeg sib ntaus.

- d. Yog tias tus neeg uas raug thauj mus ntawd yog tub ntxhais hluas, ces cov tub ceev xwm yuav ua tib zoo ceeb toom yam uas muaj zoo laj thawj mus rau tus niam txiv los sis tus saib xyuas kom sai li sai tau.
- e. Nyob rau xwm txheej uas muaj kev tsis sib haum xeeb hais txog MPD tshooj Kev Thauj Mus Los rau Kev Nkag Mus Kho Thaum Muaj Xwm Txheej Ceev, Tus Thawj Coj Saib Xyuas Hauj Lwm yuav raug hu mus rau ntawm qhov chaw muaj xwm txheej.
- f. Tsab Cai MN tshooj 253B.051 Subd. 1(e) hais tias "raws li qhov tuaj yeem ua tau, tus tub ceev xwm saib xyuas kev thaj yeeb uas muab kev thauj mus los rau tus neeg uas raug muab tso rau hauv chaw kho mob, lub khoos kas kev kho mob uas tau ua hauj lwm los ntawm xeev, los sis lub khoos kas kev kho mob uas tau ua hauj lwm los ntawm zej zog raws li feem hauj lwm me no tsis tas yuav hnav cev khaub ncaws tub ceev xwm thiab tsis tas yuav siv tsheb uas muaj cim tias yog tsheb yuam siv kev cai lij choj." Yog tias yuav tsum tau muaj qhov kev thauj mus los thiab muaj cov peev txheej uas tsis muaj cim thiab tsis muaj qauv zoo ib yam, ces cov tub ceev xwm tsim nyog siv cov ntawd los thauj.

C. Cov Neeg Uas Nyob Rau Hauv Qhov Xwm Txheej Kub Ntxhov Uas Yuav Tau Muaj Kev Ua Zoo Saib Xyuas los sis Kev Thauj Mus Los Fab Kev Kho Mob

1. Cov tub ceev xwm yuav hu EMS thiab ua kev pab thaum xub thawj raws li P&P 7-350 Kev Pab Fab Kev Kho Mob Thaum Muaj Xwm Txheej Ceev.
2. Yog tias yuav tsum tau muaj kev thauj mus los rau tus neeg uas nyob rau hauv qhov xwm txheej kub ntxhov tab tsis tuaj yeem taug kev tau vim tus yam ntxwv fab kev kho mob los sis fab lub cev ntaj ntsug los sis lwm cov xwm txheej, ces cov tub ceev xwm yuav hu rau EMS tuaj thauj tus neeg ntawd mus rau lub chaw kho mob.

D. Kev Xauv Tes Cov Tib Neeg Nyob Rau Hauv Qhov Xwm Txheej Kub Ntxhov

1. Cov tub ceev xwm yuav ua zoo ceev faj ntxiv thaum coj tus neeg nyob rau hauv qhov xwm txheej kub ntxhov mus rau hauv qhov kev saib xyuas thiab yuav siv cov voj xauv tes thaum tus neeg ntawd tsis raug ceev cia los ntawm lwm txoj hauv kev (saib raws li P&P 9-109)
2. Thaum muaj kev nyab xeeb thiab tuaj yeem ua tau, yuav muaj kev piav qhia txog kev siv cov voj xauv tes rau tus neeg uas raug xauv tes thiab rau tus ua niam ua txiv los sis ib tug neeg hauv tsev neeg (yog tias muaj) paub, uas siv cov lus phim raws hnuv nyoog rau cov me nyuam.
3. Thaum uas tus neeg nyob rau hauv qhov xwm txheej nyob tus, raws li kev tswj thiab raug xauv tes, cov tub ceev xwm yuav ceev cia tus neeg ntawd raws li kev tsom kwm saib yam tsis tu ncuu thaum uas nyob rau qhov kev saib xyuas, thiab yuav siv cov tev niv kev txo txuas mus ntxiv raws li muaj kev tsim nyog.

E. Cov Txheej Txheem Kev Tshaj Tawm

Cov tub ceev xwm uas pab rau tej qhov xwm txheej uas cuam tshuam rau tus neeg uas nyob rau hauv qhov xwm txheej kub ntxhov yuav ua raws li cov cai teeb tseg txog kev tshaj tawm txuas mus no:

1. Kev tshaj tawm kev thauj mus los rau kev nkag mus kho thaum muaj xwm txheej ceev
 - a. Thaum tus neeg uas nyob rau hauv qhov xwm txheej kub ntxhov raug muab tso rau hauv qhov kev tuav cia kev thauj mus los - los ntawm MPD, thiab raug thauj mus yam uas tsis yeem, ces tus(cov) tub ceev xwm txog kev thauj mus los yuav ua kom tiav Daim Ntawv Tshaj Tawm Ntawm Tub Ceev Xwm uas muaj npe tias CIC.
 - b. Thaum MPD yog lub chaw sawv cev pab thaum xub thawj thiab txiav txim tias qhov kev thauj mus los - los ntawm lub tsheb thauj neeg mob yeej muaj kev tsim nyog, ces tus(cov) tub ceev xwm yuav tau ua kom tiav Daim Ntawv Tshaj Tawm Ntawm Tub Ceev Xwm uas muaj npe tias CIC.
 - c. Thaum MPD tsis yog lub chaw sawv cev pab thaum xub thawj, thiab tus neeg uas nyob rau hauv qhov xwm txheej raug muab tso rau hauv qhov kev tuav cia kev thauj mus los thiab raug thauj mus los ntawm lub tsheb thauj neeg mob (los sis cov hauv kev uas tsis yog MPD), ces tus(cov) tub ceev xwm yuav thov kom MECC hloov pauv tus khauj suav rau PIC ua ntej khwb xov tooj.
 - i. Thaum MPD cov tub ceev xwm ua tiav qhov kev tuav cia kev thauj mus los uas tau thov los ntawm tus tub ceev xwm saib xyuas kev noj qab haus huv, ces MPD cov tub ceev xwm yuav rub nkag daim theej tawm ntawm daim foos tuav cia uas tau ua tiav lawm mus rau Evidence.com raws li tus nab npawb xwm txheej, thiab yuav kaw tseg daim ntawv tuav cia kev thauj mus los uas yog txhab ntxiv cov kev xam pom nyob rau hauv CAD.

2. Kev hais txog los sis kev ntes

Thaum tus neeg nyob rau hauv qhov xwm txheej raug hais txog thiab raug tso tawm los sis raug ntes vim kev ua txhaum, ces tus tub ceev xwm uas ntes yuav ua kom tiav Daim Ntawv Tshaj Tawm Ntawm Tub Ceev Xwm.

3. Tus khauj suav

Yog tias qhov xwm txheej qub (xws li, CKWEL, SUSPP, DIST) raug txiav txim tuaj tom qab tias yog qhov xwm txheej uas cuam tshuam tus neeg nyob rau hauv qhov xwm txheej, ces tus(cov) tub ceev xwm yuav thov kom MECC hloov pauv tus khauj suav rau PIC ua ntej khwb xov tooj.

4. Daim ntawv tshaj tawm

Thaum yuav tsum tau muaj daim ntawv tshaj tawm, ces cov tub ceev xwm uas sau Daim Ntawv Tshaj Tawm Ntawm Tub Ceev Xwm yuav:

- a. Siv CIC ua tus khauj xub thawj los sis suav nrog CIC ua tus khauj txhab ntxiv thaum CIC tau cuam tshuam tab sis tsis yog tus khauj xub thawj.
- b. Zam cov kev hais txog kev noj qab haus huv fab siab ntsws ntawm tus neeg rau hauv tej daim ntawv xaus lus txog kev tshaj tawm uas muaj txhawm rau nthuav tawm rau zej tsoom. Txhua cov ntaub ntawv uas hais los ntawd yuav raug kaw tseg nyob rau hauv tshooj kev piav qhia uas tsis nthuav tawm rau zej tsoom.

5. Daim foos Txheeb Sau Ntaub Ntawv Txog Kev Pab Thaum Muaj Xwm Txheej Kub Ntxhov

- a. Thaum tus khauj suav ntawm qhov kev hu yog PIC, pab pawg neeg ua hauj lwm xub thawj uas saib xyuas tsab xov tooj hu yuav ua kom tiav daim foos Txheeb Sau Ntaub Ntawv Txog Kev Pab Thaum Muaj Xwm Txheej Kub Ntxhov nyob rau hauv MDC ua ntej khwb xov tooj. Daim foos no yuav tsis hloov pauv tej cov ntawv tshaj tawm uas yuav tsum tau muaj.
- b. Cov lus nug ntsig txog daim foos Txheeb Sau Ntaub Ntawv Txog Kev Pab Thaum Muaj Xwm Txheej Kub Ntxhov tsim nyog nug rau Tus Neeg Lis Hauj Lwm Txog Kev Pab Thaum Muaj Xwm Txheej Kub Ntxhov.

F. Kev Tso Tawm Thaum Tseem Ntxov los ntawm qhov Kev Tuav Cia Kev Thauj Mus Los - los sis Kev Tuav Cia 72 Teev

Yog tias lub chaw kho mob tso tus neeg tawm ntawm qhov kev raug muab tso rau hauv kev tuav cia kev thauj mus los - los ntawm MPD cov tub ceev xwm los sis qhov kev raug muab tso rau hauv kev tuav cia 72 teev los ntawm lub chaw kho mob, ua ntej ncuas sij hawm kev tuav cia tag sij hawm, txhua cov kev ceeb toom uas tau cuam tshuam los ntawm lub chaw kho mob yuav raug xa txuas mus rau tus thawj coj saib xyuas hauj lwm hauv cheeb tsam nyob rau hauv cheeb tsam uas tus neeg raug muab tso nkag rau hauv qhov kev saib xyuas. Tus thawj coj saib xyuas hauj lwm yuav tshab xyuas qhov xwm txheej thiab ua qhov kev txiav txim siab hais txog cov kev nqis tes ntxiv.

G. Cov hauv kev xaiv txog kev xa txuas mus

1. Cov hauv kev xaiv txog kev xa txuas mus rau cov chaw sawv cev kev noj qab haus huv fab kev coj cwj pwm thiab kev pab cuam zej tsoom, cov chaw muaj ntaub ntawv rau qub tub nrog thiab neeg tsis muaj vaj tsev nyob, cov chaw pab cuam me nyuam yaus thiab tub ntxhais hluas, thiab cov txheej teg kev ua hauj lwm tsev kho mob yog tau muab nyob rau hauv MPD lub vev xaib Sharepoint raws li Cov Chaw Muaj Ntaub Ntawv Rau Kev Pab Thaum Muaj Xwm Txheej Kub Ntxhov.

2. Yog tias tus tub ceev xwm kawm paub txog lub chaw sawv cev tshiab uas tuaj yeem raug siv ua lub chaw muaj ntaub ntawv, ces tus tub ceev xwm tsim nyog ceeb toom rau Tus Neeg Lis Hauj Lwm Txog Kev Pab Thaum Muaj Xwm Txheej Kub Ntxhov paub los ntawm email thiab suav nrog lub npe lub chaw sawv cev, chaw nyob thiab nab npawb xov tooj nrog rau cov chaw muaj ntaub ntawv uas tuaj yeem muab tau. Tus Neeg Lis Hauj Lwm Txog Kev Pab Thaum Muaj Xwm Txheej Kub Ntxhov yuav txhab ntiv cov ntaub ntawv rau hauv Cov Chaw Muaj Ntaub Ntawv Txog Kev Pab Thaum Muaj Xwm Txheej Kub Ntxhov.

H. Cov pab pawg neeg ua hauj lwm Pab Thaum Muaj Xwm Txheej Kub Ntxhov Fab Kev Coj Cwj Pwm (Behavioral Crisis Response, BCR)

1. BCR li kev teb

Thaum nyob rau hauv lub luag hauj lwm, cov pab pawg neeg ua hauj lwm BCR yuav teb rau cov tsab xov tooj 911 uas cuam tshuam rau cov tswv cuab hauv zej zog uas muaj cov kev cov nyom kev noj qab haus huv fab siab ntsws. Cov xov tooj hu thov kev pab cuam yuav raug xa mus rau cov pab pawg neeg ua hauj lwm BCR los ntawm MECC nkaus xwb. Lawv tsis muaj tus xov tooj pab rau thaum muaj xwm txheej kub ntxhov. Lawv yuav raug hu los ntawm kev xa.

2. BCR cov kev thauj mus los

Cov pab pawg neeg ua hauj lwm BCR tuaj yeem thauj tau cov neeg uas yeem xwb. Lawv yuav tsis thauj cov neeg uas raug muab tso rau hauv qhov kev tuav cia kev thauj mus los.

3. Hom kev hu thiab kev kuaj xyuas

- a. Thaum cov pab pawg neeg ua hauj lwm BCR nyob rau hauv lub luag hauj lwm, ces MECC yuav kuaj xyuas cov xov tooj hu txhawm rau txiav txim seb lawv puas phim cia rau BCR teb. Cov xov tooj hu uas hais los ntawd yuav raug xaiv raws li cov khauj suav ntawm:
 - BCR (Kev Pab Thaum Muaj Xwm Txheej Kub Ntxhov Fab Kev Coj Cwj Pwm), thiab
 - BCRW (Kev Noj Qab Nyob Zoo Ntawm Kev Pab Thaum Muaj Xwm Txheej Kub Ntxhov Fab Kev Coj Cwj Pwm)
- b. Yog tias pab pawg neeg ua hauj lwm BCR tsis nyob rau hauv lub luag hauj lwm los sis tsis khoom los teb, los sis yog tias cov xwm txheej kev hu muaj kev hloov pauv uas yuav tsum yog Tus Tub Ceev Xwm Uas Tau Txais Kev Cob Qhia Txog Kev Pab Thaum Muaj Xwm Txheej Kub Ntxhov los teb, ces MECC yuav hloov pauv tus khauj suav kom phim rau MPD tus khauj suav (PIC, CKWEL, thiab lwm tus) thiab yuav xa rau pab pawg neeg ua hauj lwm. Cov pab pawg neeg ua hauj lwm BCR yuav ua raws li cov tub ceev xwm cov lus qhia thaum tuaj txog.

- c. Cov tub ceev xwm uas raug xa mus rau cov xov tooj hu uas hais los ntawd yuav ua raws li MPD txoj cai tam sim no thiab kev cob qhia txog kev teb cov xov tooj hu no.
- d. Saib raws li tus qauv cai MECC, Tus Tub Ceev Xwm Uas Tau Txais Kev Cob Qhia Txog Kev Pab Thaum Muaj Xwm Txheej Kub Ntxhov yuav tsum raug xa mus rau cov xwm txheej uas cuam tshuam cov neeg uas nyob rau hauv qhov xwm txheej kub ntxhov uas ntseeg tias muaj mob fab siab ntsws los sis muaj kev xiam oob qhab fab kev loj hlob, nyob rau hauv cov xwm txheej txuas mus no:
- Riam phom los sis kev nkag mus siv riam phom uas tau cuam tshuam
 - Cov riam phom uas lawv muaj nyob rau tam sim no los sis kev tso hem thawj tias yuav siv riam phom
 - Muaj kev ua phem rau lub cev ntaj ntsug los sis tso hem thawj tias yuav ua phem fab lub cev ntaj ntsug rau lwm tus
 - Thaum muaj kev raug mob uas muaj kev phom sij txog txoj sia (piv txwv: muaj qee tus neeg tau noj cov tshuaj ntsiav, noj ntau tshaj li kws kho mob qhia, haus cawv, thiab lwm yam.)
 - Cov xwm txheej uas cuam tshuam rau kev pab fab lub cev ntaj ntsug txhawm rau ua kom muaj kev nyab xeeb, xws li qee leej neeg nyob rau saum choj los sis ntsa tsev uas siab.
 - Thaum pab pawg neeg ua hauj lwm BCR nyob rau hauv lub chaw thiab txiav txim tias qhov chaw muaj xwm txheej yeej tsis muaj kev nyab xeeb.